

16.09.2019.

Obrazovanje je jedan od faktora razvoja BPK Goražde



U organizaciji Ministarstva za obrazovanje, mlade nauku, kulturu i sport Bosansko-podrinjskog kantona Goražde, u saradnji i uz finansijsku podršku DVV International Ured za Bosnu i Hercegovinu, danas je u Sali Biznis centra u Goraždu održan Okrugli sto o temi „Unaprjeđenje saradnje obrazovanja odraslih i privrede“.

Okruglom stolu, pored ministara u Vladi BPK Goražde, direktorice Službe za zapošljavanje i predstavnika Privredne komore, prisustvovali su i predstavnici poslodavaca te Udruženja za lokalne razvoje inicijative „ALDI“.

Cilj Okruglog stola je da kroz dijalog učesnika u ovom procesu promovira obrazovanje odraslih i ukaže na potrebu koordiniranog pristupa kako bi obrazovanje odraslih dalo poželjne rezultate u kontekstu ostvarivanja ličnog, profesionalnog i društvenog razvoja.

Prema riječima ministra za obrazovanje, mlade, nauku, kulturu i sport BPK Goražde Armana Bešlije, naš kanton usvojio je sve zakonske i podzakonske akte koji se odnose na unaprjeđenje obrazovanja na prostoru našeg kantona.



„Obrazovanje odraslih je jako bitan segment u razvoju kantona. S tim u vezi, donijeli smo sve zakonske i podzakonske akte, tako da je u prethodnom periodu prošlo obuku preko 1500 radnika koji su pronašli zaposlenje u privrednim subjektima. Doneseni su i pravilnici po hitnom postupanju tako što da što hitnije možemo dati obuku za potrebe tržište rada. Takođe, donijeli smo i Strategiju o obrazovanju odraslih tako da je ovaj Okrugli sto sumiranje svega što smo do sada uradili i što planiramo ubuduće da radimo zajedno sa našim partnerima, to jeste privredom

i međunarodnim organizacijama koji ovdje rade i djeluju. Naredni koraci su da implementiramo sve što smo naveli u Strategiji obrazovanja odraslih te da uključimo što više privrednih subjekata u cijeli sistem“- kazao je ovom prilikom ministar za obrazovanje, mlade, nauku, kulturu i sport BPK Goražde Arman Bešlija.

Kako je istaknuto na današnjem Okruglom stolu, Bosna i Hercegovina je u zadnje vrijeme napravila velike pomake kada je uređenje ove oblasti u pitanju, ali Bosansko-podrinjski kanton prednjači, uključujući i činjenicu da je BPK Goražde prvi kanton u FBiH koji je usvojio Strategiju obrazovanja odraslih.

DVV International, Ured za BiH već duži niz godina podržava Ministarstvo za obrazovanje, mlade, nauku, kulturu i sport u razvoju ove oblasti, a današnji Okrugli sto bio je prilika da se definisu naredni koraci.



„Danas su se ovdje okupili svi relevantni akteri iz ove oblasti s područja BPK Goražde kako bi zajednički formulisali zaključke i slijedeće korake kako bi implementacija ovih oblasti zaživjela. Moram još istaknuti da je BPK Goražde prvi u Federaciji i BiH usvojio Strategiju za razvoj obrazovanja odraslih 2019/2023. koja predviđa temeljitu implementaciju zakona, odnosno razvoj te oblasti na području BPK Goražde. Želim da napomenem da svako razvijeno društvo mora omogućiti takav obrazovni sistem da ljudi mogu da uče tokom cijelog života“-istaknuo je direktor DVV International Ureda za BiH Emir Avdagić.

Naš kanton sa procesom prekvalifikacije i dokvalifikacije krenuo je još 2010.godine, otvaranjem firme „Prevent“.

„Nakon toga, svaki poslodavac koji je dolazio na prostor kantona i imao potrebu za edukacijama i obukama mi smo imali lokalno partnerstvo koje je funkcionalo izvanredno. Tako da je preko 1500 osoba odradilo prekvalifikaciju i dokvalifikacije i našlo radno mjesto, što je izuzetan rezultat, a što mislim niti jedan kanton u FBiH nije postigao. Vrlo je važno da mi budemo zajedno, da slušamo jedni druge, uvažavamo što kažu institucije i na određeni način pravimo projekte koji su pomoć i podrška i nezaposlenim osobama s jedne strane i poslodavcima koji će doći do kvalitene radne snage“-riječi su direktorice Službe za zapošljavanje BPK Goražde Nafije Hodo.



